

Ibu bapa perlu buat persediaan awal

Rancang pengurusan kewangan keluarga supaya tidak terbeban

SHAH ALAM - Isu bebanan kos kelengkapan persekolahan termasuk kos membeli buku rampaian dan buku kerja sekolah bukanlah perkara asing, sebaliknya ibu bapa sedia maklum bakal menghadapi perkara itu setiap kali menjelang musim persekolahan baharu.

Justeru, persediaan sejak awal sebelum ketibaan sesi persekolahan seperti pengurusan perbelanjaan kewangan keluarga yang berhemah perlu diaplikasikan agar isu itu tidak menjadi satu perkara yang membebankan apabila tiba masanya.

Pensyarah Kanan Putra Business School, Universiti Putra Malaysia (UPM), Dr Ahmad Razman Abdul Latiff berkata, ibu bapa boleh mempertimbangkan beberapa teknik pengurusan kewangan bagi memastikan kos kelengkapan sekolah anak-anak dapat diatasi.

"Cuma keistimewaan tahun ini bagi kakitangan kerajaan ialah apabila kerajaan memberi bantuan khas RM1,000 berdasarkan Bajet 2018 yang dibayar pada 8 Januari... sekurang-kurangnya dapat ringankan beban lebih satu juta ibu bapa.

"Bagi kakitangan swasta pula memang dilihat menjadi beban yang perlu diambil kira... yang penting sebenarnya perancangan perlu

dilakukan sebelum tiba awal musim persekolahan, jadi budaya menyimpan patut disemaikan sejak awal," katanya.

Menurutnya, antara teknik penyimpanan yang boleh diamalkan ialah menetapkan sama ada peratusan tertentu daripada gaji bulanan untuk ditetapkan sebagai simpanan.

"Sebagai contoh, jika ada dua anak dan jumlah diperlukan sebanyak RM400, mungkin boleh simpan RM40 sebulan dari awal tahun, jadi hujung tahun sudah ada RM480, cukup untuk bayar jumlah yang diperlukan," katanya.

Mengulas dari perspektif situasi ekonomi berbanding negara lain, Ahmad Razman menjelaskan, memang kos pendidikan di negara yang mengamalkan dasar pendidikan percuma dilihat jauh lebih baik.

Namun, katanya dari satu segi yang lain pula perlu dilihat faktor cukai yang dikenakan negara berkenaan berbanding dasar cukai yang dikenakan di Malaysia.

"Soal perbandingan dengan negara lain saya melihat perlu ada



AHMAD RAZMAN

konsep *give and take*...saya pun baru pulang dari Kanada dan semasa di sana saya ada berjumpa dengan beberapa delegasi dari Finland, Denmark, Sweden dan beberapa negara yang mengamalkan pendidikan percuma.

"Walaupun dasar mereka

pendidikan percuma, tetapi bila saya tanya soal cukai pendapatan secara individu, rata-rata pada kadar 40 hingga 45 peratus dan kadar cukai GST contohnya di Kanada pada kadar 15 peratus....magnanya jika dikira cukai pendapatan ini apabila dicampur sekitar 50 hingga 55 peratus cukai dikenakan, tapi duit itu akan digunakan untuk pendidikan percuma.

"Jika kita lihat di negara kita, paling tinggi pun pendapatan cukai individu sekitar 30 peratus termasuk cukai GST, jadi kita masih lagi ada pendapatan yang boleh dibelanjakan (*disposable income*)... jadi pendapatan inilah yang kita boleh belanjakan untuk keperluan persekolahan anak," katanya.